

GAMGILE CHRISTIAN UPNA KIDO

Gamgi cih kammal i zak ciangin, i lungsim sungah hongsuak thu in, *gamgi* khenna, leitang gikhenna, innhuang gikhenna cihbangan i phawkhi. Ahi zongin, tuate sangin atangzai zaw in i etciangin, '*Gamgi*' cih kammal in thutampi huamin, latampi henhi. Tua thutampi te sungah, bang *Gamgi* te in tuhun tulai takin, i Christian upna hong nawngkaisak in, bangci bangan hong susia thei hiamcihthu in aphawkhuai mahmah thu ahihi. *Gamgi* (Kigi) cih kammal pen gamvai (political term) tawh gen hileng, gending suutding tangzaitakin a ommah bangan, upna kammal tawh i gen ciangin zong tua bangmah in hong tangzai hi. *Gamgi* (kigi) cihciangin, atomno khatin genleng kikhenna, kideidan na cikhkhatna nei hi. Tua ahih manin, sihna hongtun ciangin, gi bangkhenta dingmaw ci-in, luankhi nul in i kap hi. Cihnopna in, sihna in ahinglai te leh asi mi nu/pa *gamgi* hongkhen in, khawlna kikhat theinawn lo, lenna kikhat theinawnlo in, nek nekhawm thei nawnlo, dawn dawnkhawm theinawnlo zahdongin, asi leh ahingte kikal gi hongphut hi.

Hun zangkhawmthei nawnlo, tong kumkhawmthei nawn lo, nuikhawmthei nawnlo, zaila awikhawmthei nawnlo in sih na in ei leh asi mi nu/pa kikal ah gam nih hong suahin, gi hong khenhi. Tua ahih manin, gibangkhenna hong tun simin, i tuak sialsial, i thuak sialsial in lainatna tawh khitui luangin, i nunna leh i pianzia te lamdangsa in, hidan maw leitung nuntak ci-in i thuum hi. Tua in sihna hang ahi a, athu tuamtuam hangin, i it mahmah ih ngaihmahmah minu/pa tawh bangthu bangthu tawh i ki khen ahi zongin, gi hongkhen ahih manin, lungsim natna, dahna, lunglengna, khuangaihna le khitui luanna tawh thu i khup tawntung hi. Bangzah in khasiat huai hiam? Tua ahih manin '*Gamgi*' i ci a, '*Kigi*' ahi a, '*gi*' i ci ahi zongin hi bang kammal te in, kamnamtui ahih lohna thu i phawk sem hi.

Tua hi leh '*Gamgi*', '*Kigi*' le '*gi*' cih te in ei Christian te upna tawh bangci kithupuak theihding a, bangci kithupua lo

thei hiam cih thu in athupi ahihi. Lamkhatpan in genleng, 'Gamgi' 'Kigi' cih kammal te in Christian upna tungah bangci bangin gualzawhna la in, koici bangin Christian thu ummi te zothei a, tua *gamgi* ah Christian te bangci nuntak in, bangci kizop uhhiam cihthu athupi ahihi. Adiakdiak in ei Zogam le Zomi (Zomi context) Christian te adingin bang 'Gamgi' i mu thei dinghiam? Tua 'Gamgi' bangci i kantanzo dinghiam? Bangcihleng *Gamgi* neilo Christian upna innpi, Christian gam (*gamgi* omlo Zomi Christian gam) i suah thei dinghiam?

Tu in 'Gamgi' ahih kei leh 'kigi' cih in nisim i nuntakna ah bangkhiatna teng neithe hiam cih i en masa dinghi. *Gamgi*/kigi cihciangin, kikhenna, ki deidanna, kizop theilohna hi-in, nang le kei hongkhen thu leh na, nang le kei hong kizomsak theilo, hong kithupuasak theilo nuntakzia ngeina te in nang le kei kikal ah *gamgi*/kigi hongsuak hi. Zomi te in Pasian minam, thupha ngah minam hihang ci-in, thu in genin, la in i sa hi. Himah tase leh *gamgi* tampi i nei veve hi. Minam lungsim *gamgi*, beh le phung *gamgi*, khua *gamgi*, sum le paai *gamgi* cihbang in i nei a, tua *gamgi* te tungah Christian upna tawh gualzawh i sawm sangin, tua *gamgi* khenna te zangin Pasian apau lap kitamzaw hi. Bang hangin tuabangin *gamgi* kantanlo in, gi khenzaw behlap i hiam?

Minam khualna, beh le phung khualna, sung le pu khual na thute hang ahihi. Pasian thu leh gupkhiatna thuhang hi lohi cih thu kimu thei hi. Ei Zomi te pen, khanglui laipek pan in, akhuakhua abehbeh in khuadawi behdawi nei in, eimau aituam ciat paai in abia te ihihi. Christian hongtun khit kumza cingval tase mahleh, pupa te khuadawi, behdawi nei in, amau aituam tek abiak hun lai uha alungsim te i paaikhiazo naikei hi. Hih thuhangin, behkhat pawlpi khat, khuakhat pawlpi khat i phuan khiaphial ta a, Zomi Christian te sungah, pawlpi min in gibang hongkhen in, tua *gamgi* ah lungsim siangtho thu ummi, thuzui mi tampi te in puuklawh in, sihlawh thei uhhi.

Christian upna in *gamgi* nei lo, deidan neilo cih i khuak in thei hina pi-in, nisim ih nuntakna ah, pawlpi min tuamtuan

hangin, kideidan na, kikhen na, ki totkisel na thu te i za a, isin a, i thei hi. Hih thu nakpitak in lungngaihhuai hi. Aki it mah mah nupa kalsung nangawn gi hongkhen thei thu in hih thu ahihi. Minam tungah akinga lo, beh le phung tungah akiphut lo, sung le pu thu ahilo Pasion thupen tua gamgi te zangin gi i khen a, gamtuam leituam i satnopman in, Zomi te i kilem thei ngei kei hi. Christian upna in leitungvai gamgi/ kigi cih khem peuhte tungah gualzawhna ala gupkhiatna thu ahihi. Pau kibat lohna, ngeina kibatlohna, minam kibatlohna, beh le phung kibat lohna te khempeuh (cf. Piansil 11:1-9, Sawltak 2) in ei Zomi Christian te sungah kigi hongphut nawnloh nading khangthak momno Christian te in hanglung ciam in, ma i pang khawmding hi.